#### 4-1201-2401/1193-сонли иш

### АЖРИМ

(аризани кўрмасдан қолдириш)

# Гулистон шахри

2024 йил 8 апрель

Гулистон туманлараро иқтисодий суди, судья Б.Махмудов раислигида, судья ёрдамчиси Ж.Эгамова суд мажлиси котиблигида, аризачи вакили А.В.Головина (2023 йил 2 июндаги 02/13-35/79-сонли ишончнома асосида) иштирокида, аризачи Сирдарё вилояти Иқтисодиёт ва молия бош бошқармасининг жавобгарлар "МҮ-STAR-GOLD" масъулияти чекланган жамияти ва Гулистон шахар Ободонлаштириш бошқармасига нисбатан 102 350 000 сўмни ундириш тўғрисидаги даъво аризаси юзасидан Ўзбекистон Савдо саноат палатаси Сирдарё вилоят худудий бошқармаси хузуридаги доимий фаолият кўрсатувчи Ҳакамлик судининг 2019 йил 13 майда қабул қилинган ҳал қилув қарорини бекор қилиш тўғрисидаги аризаси бўйича қўзғатилган иқтисодий ишни ўз биносида, очиқ суд мажлисида кўриб чиқиб, куйидагиларни

### АНИКЛАДИ:

Ўзбекистон Савдо саноат палатаси Сирдарё вилоят худудий бошқармаси хузуридаги доимий фаолият кўрсатувчи Хакамлик судининг 2019 йил 13 майдаги SR-HS/164-сонли хал қилув қарорига асосан, "MY-STAR-GOLD" масъулияти чекланган жамиятининг даъво талаблари қаноатлантирилиб, Гулистон шаҳар Ободонлаштириш бошқармаси ҳисобидан "MY-STAR-GOLD" масъулияти чекланган жамияти(кейинги ўринларда — жавобгар ва/ёки жамият) фойдасига 102 350 000 сўм ундирилган.

Аризачи Сирдарё вилояти Иктисодиёт ва молия бош бошкармаси (кейинги ўринларда — аризачи) Гулистон туманлараро иктисодий судига ариза билан мурожаат килиб, Ўзбекистон Савдо саноат палатаси Сирдарё вилоят худудий бошкармаси хузуридаги доимий фаолият кўрсатувчи Хакамлик судининг 2019 йил 13 майдаги SR-HS/164-сонли хал килув карорини бекор килишни сўраган.

Суд мажлисида иштирок этган аризачи вакили ариза талабини қўллаб қувватлаб, ундаги важларни такрорлаб, Ўзбекистон Савдо саноат палатаси Сирдарё вилоят худудий бошқармаси хузуридаги доимий фаолият кўрсатувчи Хакамлик судининг 2019 йил 13 майдаги хал қилув қарорини бекор қилишни сўради.

Гулистон шахар Ободонлаштириш бошқармаси ва жавобгар вакиллари иш муҳокамасининг вақти ва жойи тўғрисида тегишли тарзда хабардор қилинган бўлса-да, унинг вакил (лар)и суд мажлисига келмади ҳамда ариза юзасидан ўз фикр-мулоҳазаларини тақдим этмади.

Ўзбекистон Республикасининг Иқтисодий процессуал кодекси (кейинги ўринларда —ИПК) 170-моддаси учинчи қисмига асосан иш мухокамасининг вақти ва жойи тўгрисида тегишли тарзда хабардор қилинган жавобгар, учинчи

шахслар суд мажлисига келмаса, низо уларнинг йўқлигида ҳал қилиниши мумкин.

Шу сабабли суд ИПК талаблари асосида ишни Гулистон шахар Ободонлаштириш бошқармаси ва жавобгар вакил (лар)и иштирокисиз кўриб чиқишни лозим топади.

Суд, ишдаги мавжуд хужжатларни ўрганиб чиқиб, куйидаги асосларга кўра даъвогарнинг даъво аризасини кўрмасдан қолдиришни лозим топади.

ИПКнинг 13-моддаси биринчи қисмига асосан суд ишларни Ўзбекистон Республикаси Конституцияси ва қонунлари, бошқа қонунчилик ҳужжатлари, шунингдек Ўзбекистон Республикасининг халқаро шартномалари асосида ҳал килади.

Иш хужжатлари ва суднинг махсус электрон дастуридан олинган маълумотдан кўринишича, Гулистон туманлараро иктисодий суди томонидан аризачи Сирдарё вилоят давлат солик бошкармасининг аризасига асосан 2023 йил 11 апрелда жавобгарга нисбатан 4-1201-2301/1270-сонли ҳал қилув қарорига асосан тўловга қобилиятсиз (банкрот) деб топилган ва унга нисбатан тугатишга доир иш юритиш бошланган.

"Тўловга қобилиятсизлик тўғрисида"ги Ўзбекистон Республикасининг Қонуни 12-моддаси биринчи, иккинчи қисмига кўра, тўловга қобилиятсизлик тартиб-таомиллари кўлланилаётганда барча кредиторларнинг манфаатларини кредиторлар йиғилиши ёки кредиторлар қўмитаси ҳимоя қилади. Суд қарздорга нисбатан тўловга қобилиятсизлик тўғрисида иш қўзғатиш ҳақидаги аризани иш юритишга қабул қилиб олган кундан эътиборан кредиторлар қарздорга ўз талабларини якка тартибда қаноатлантириш мақсадида мурожаат қилишга ҳақли эмас. Қарздорга нисбатан бажариладиган барча ҳаракатлар кредиторлар номидан кредиторлар йиғилиши ёки кредиторлар қўмитаси томонидан амалга оширилади.

Бинобарин, ИПК 107-моддасининг 9-бандига кўра жавобгарга нисбатан банкротлик тўгрисида иш кўзгатилган бўлса ва жавобгарга нисбатан такдим этилган талаб конунга кўра банкротлик тўгрисидаги иш доирасида кўрилиши лозим бўлса — иктисодий суд даъво аризасини кўрмасдан колдиради.

Бундай ҳолатда суд, жавобгарга нисбатан тўловга қобилиятсизлик тўғрисида 4-1201-2301/1270-сонли иш қўзғатилганлиги сабабли суд, даъвогарнинг даъво аризасини кўрмасдан қолдиришни лозим топади.

Ўзбекистон Республикаси Олий суди Пленумининг 2020 йил 19 декабрдаги "Иқтисодий ишлар бўйича суд харажатларини ундириш амалиёти тўгрисида" 36-сон қарори 3-бандида иш юритишни тугатиш тўгрисидаги, даъвони кўрмасдан қолдириш тўгрисидаги, суд жарималарини солиш тўгрисидаги ажримлар устидан давлат божи ундирилиши ҳақида тушунтириш берилган.

Шу муносабат билан суд, давлат божи ва почта харажати масаласини мухокама қилиб, ИПК 118-моддаси ва "Давлат божи тўғрисида" ги Ўзбекистон Республикасининг Қонуни 19-моддасига мувофик ундирилиши лозим бўлган давлат божи аризачи зиммасига юкланиши лозим эди, бирок, аризачи давлат божи тўлашдан озод этилганлиги сабабли, суд давлат божини ундирувсиз

қолдириб, олдиндан тўланган 34 000 сўм почта харажатларини аризачи зиммасида қолдиришни лозим топади.

Юқорида қайд этилганларга асосан ҳамда Ўзбекистон Республикасининг Иқтисодий процессуал кодекси 66, 68, 107-109, 118, 166, 195-моддаларини қўллаб, суд

## АЖРИМ КИЛДИ:

Арзачи Сирдарё вилояти Иқтисодиёт ва молия бош бошқармасининг даъво аризаси кўрмасдан қолдирилсин.

Олдиндан тўланган 34 000 сўм почта харажати аризачи Сирдарё вилояти Иқтисодиёт ва молия бош бошқармаси зиммасида қолдирилсин.

Давлат божи ундирувсиз қолдирилсин.

Ажримнинг кўчирма нусхаси тарафларга юборилсин.

Ажрим қабул қилингандан қонуний кучга киради.

Ажрим устидан у қабул қилинган кундан эътиборан бир ойлик муддатда шу суд орқали Сирдарё вилоят судининг иқтисодий ишлар бўйича судлов ҳайъатига апелляция тартибида ёки қонуний кучга кирган ва апелляция тартибида кўрилмаган ажрим устидан у қонуний кучга кирган кундан эътиборан олти ой ичида кассация тартибда шикоят қилиш (протест келтириш) мумкин.

Раислик қилувчи

Б.Махмудов

